

Loko, Seku, i Kontentu!

Kisas algun hende lo yamámi loko, ma nunca mi a bebe alkohòl...ni asta un gota! Wèl, mi no mester gaña. Tempu mi tabata mucha mi a tende di un hòmber ku tabata tan adikto di alkohòl ku el a bebe Limacol. Poko dia despues, mi a disidí pa savoriá esei. E Limacol a hasi un milager! Instantaneamente mi a kura di tur deseo pa mas alkohòl!

Desde e tempu ei, mi tabatin amplio oportunitat pa dal un serbes. Na vários okashon hende a ofresémi bibida alkohóliko. Ma nunca mi a tuma. Dikon? Pèrmitími kompartí algun motibu.

1) MI NO TA MIRA KU BIBIDA ALKOHOLIKO LO BENEFISIAMI. Apòstel Pablo a bisa, “*Tur kos ta pèrmití pa mi, ma tur kos no ta kumbini...*” (1 Korintionan 6:12). Djis pasobra algu ta legal no ke men ku e lo benefisiábo. Alkohòl sigur ta algu asina. Hende ku ta gusta bebe por lista mil-i-un benefisio (mihó bisá “ekskusa”) pa usa bibida. Ma te awe mi ni asta a tende un motibu konvensiente.

2) MI TA MIRA HOPI DESBENTAHA PA USO DI BIBIDA ALKOHOLIKO. Tin un kantidat grandi di desbentaha pa uso di alkohòl. Hende ku ta bebe tin mas chèns di tin problema ku salú: problema di higrá òf stoma, ferlaming parsial di algun múskulo, asta lokura. Un porsentage grandi e aksidente (na trabou i di trafiko) ta kousá pa alkohòl. Un estudio a haña ku 70-80% di shofürnan ku a muri den aksidente di trafiko tabatin beten aden. I tantu víktima inosente ta muri na man di un shofür bou di su awa. Un otro estudio a konkluí ku alkohòl ta pone nos paga 40% mas na seguro di outo.

Un porsentahe grandi di krímen ta kometé bou di influensia di alkohòl. Bibida ta kousa tantu problema familiar: violensia, maltrato, problema finansiero, pobresa, divorsio, bidanan i famianan kibrá. Mas ku un tata ta yega kas blo bashí despues di kobra, gastando su sèn pa serbes. E alkohòlista su produktividat na trabou ta baha resultando den pèrdida di trabou.

Beibel ta laga sa ku alkohòl ta hasi daño na bo relashon ku Dios, deklarando ku hende ku ta kometé e piká di “*buracheria ...lo no eredá e reino di Dios*” (Galationan 5:19-21).

3) BIBIDA ALKOHÓLIKO FÁSILMENTE POR DOMINÁ UN PERSONA. Ningun hende ku ta tuma su promé serbes ta plania bira un alkohòlista. Ma tòg esei ta presis loke a sosodé bes tras bes. Apòstel Pablo a skirbi, “*tur kos ta pèrmití pa mi, ma lo mi no laga nada dominámi*” (1 Korintionan 6:12). **Si bo no ta tuma e promé slòk, ta impusibel pa alkohòl dominábo.**

Ademas, hopi hende ta pretendé ku nan tin kontrol riba nan uso di alkohòl...ku nan por stòp di bebe ki ora ku ta. Si bo ta un di nan, stòp di gaña bo mes. Chèk bo mes: bo por **keda sin bebe pa ún luna**. Si bo no por, alkohòl tin bo dominá!

4) MI USO DI BIBIDA ALKOHOLIKO POR ENKURASHA OTRO HENDE PA US’E. Dios ta tenémi responsábel si mi ta pone un otro persona riba un mal kaminda. Romanonan 14:21 ta bisa, “*Ta bon pa no kome karni ni bebe biña, òf hasi kulakier kos ku ta hasi bo ruman trompeká.*” Si mi ta bebe, otro hende, mirando mi ehèmpel kisas lo bebe tambe. Mi ta konvensé ku alkohòl ta un kaminda malu. Mi no ke progapandá alkohòl dor di mi ehèmpel, dor di bisti flanèl di Amstel, ni asta dor di usa biña pa sena di Señor. (Nos iglesia ta usa djus di wendrùif.)

Un persona ku sigur ta wak bo ehèmpel ta bo yu. Si bo ta gosa bo droga favorito, alkohòl, kiko lo bo bis’é ora e ke usa su droga favorito, kokaina? **Abo ta pon’é riba un mal kaminda!**

Kisas algun hende ta yamámi loko. Ma mi ta preferá ta loko, seku, i kontentu na lugá di ta adikto di un bòter.